

Per la settavla giada na al proporz

DA MARTIN CABALZAR

■ **Per la settavla giada ha il suveran grischun refusà l'introducziun dal proporz tar las elecziuns dal cussegl grond. L'iniziativa populara per elecziuns gistas è vegnida refusada cun 40 104 vuschs cunter 31 382 vuschs. La participaziun ha muntà a 55,11 per-tschient.** Acceptà il proporz han suletamain ils circuls da Cuira (6163:5740) e dals Tschintg Vitgs (3096:3044). Da las vischnancas grischunas han las suandontas vischnancas acceptà l'iniziativa «Per elecziuns gistas»: Alvaschein, Castaneda, S. Maria/Calanca, Selma, Cuira, Paspels, Pratval, Scharans, Haldenstein, Landquart, Luven, Pitasch, Schnaus, Riein, Malans, La Punt-Chamues-ch, Madulain, Ardez, Favugn, Tumein e Trin. A Tarasp èn las vuschs gulivas, a Pigniu ha il proporz insumma nagins simpatisants. Tuts 14 che han prendì part da la votaziun han refusà l'iniziativa.

Tge vuleva l'iniziativa

L'iniziativa dal pievel «Per elecziuns gistas» pretendeva da midar la procedura ver-

tenta da maiorz a la procedura da proporz. La nova procedura duai vegnir applitgada per l'emprima giada tar las elecziuns dal cussegl grond da l'onn 2014. Entant che la regenza ha recumandà la procedura da proporz dentant pir per l'onn 2018 ha la gronda maioritad dal cussegl grond refusà questa cuntrapposta da cumpromiss. Uschia duai il proporz pia vegnir introduci en il Grischun gia tar las proximas elecziuns dal cussegl grond.

Tenor ils iniziants na privilegieschia il sistem electoral da maiorz vertent betg mo partidas grondas, el cuntrafetschia er al princip da la forza electorala che resulta da princip costituziunal impurtant da l'egualitad giuridica. Il sistem actual sfasifitgeschia perquai la forza electorala, betg mo tranter center e periferia, ma bain en tut il chantun. Il cussegl grond stoppia dar in vair maletg dal chantun, han ils adversaris argumentà.

Ils adherents dal maiorz han fatg valair che quest sistem resguarda meglier la relaziuns spezialas e las differenzas culturalas e linguisticas da noss chantun. Plinavant saja quest sistem pli simpel e transparent.

Ils votants n'han betg laschè manar en err

Tenor cusseglier naziunal *Martin Candinas* (pcd) èn Grischunas e Grischuns s'exprimids ina ulteriura giada per mantegnair il sistem da proporz tar las elecziuns dal cussegl grond. Els n'hajan betg laschè manar en err dals arguments memia transparents dals iniziants ed hajan dà dapli paisa ad ina represchentanza equilibrada da las regiuns e da represchentanza tenor partidas. I saja da sperar che ils iniziants acceptian ussa finalmain il verdict dal pievel e ch'els na sajan betg schlets sperdiders ed emprovan ussa da survegnir raschun tar las dretgiras.

Socialdemocrats e populars èn trumpads da la decisiun

Il parsura da la Partida socialdemocrata dal Grischun *Jon Pult* taxescha la decisiun dad ier pertutgant il proporz «sco deplorabla ord optica da la politica statala». La garanzia dad in mandat per ils circuls pitschens saja apparentamain vegnida validada dapli ch'in sistem electoral che concedia a tut las burgaisas ed als burgais la medema forza da votar.

Damai che quai na saja betg garantì cun il sistem electoral vertent è la Partida socialdemocrata da l'avis che las elecziuns da maiorz cuntrafetschian a la constituziun federala. I saja perquai da quintar che il tribunal federal vegnia a decider proximamain schebain il sistem actual è valaivel u betg.

Deputà *Andrea Davaz* (pps) sincerescha ch'els stoppian prender enconuschientscha da la scunfitta suenter in cumbat da votaziun engaschè. Era sch'el saja dischillus dal resultat saja quel d'acceptar. Entant che il cumbat per l'Olimpada haja absorbà bler temp n'hajan ins betg pudì discutir a fund ils avantatgs dal proporz, di Davaz. I restia deplorablamain uschia che tar il maiorz saja la proporziun tanter la grondezza dals singuls circuls e tranter las singulas burgaisas ed ils singuls burgais disturbà masivamain. Per ils adherents dal proporz saja evident che il maiorz violeschia la constituziun federala e cuntrafetschia al dretg d'egualitad. I saja perquai previsibel che il tribunal federal vegnia la finala a decider co il pievel grischun haja d'eleger ses parlament, deplorescha Andrea Davaz.



Ils politichers grischuns Martin Candinas, Jon Pult ed Andrea Davaz commenteschan differentamain il resultat da l'iniziativa da proporz.